

Piniarneq aallaaniarnerlu pillugit Inatsisartut inatsisaata nr. 12, 29. oktober 1999-imeersup allanngortinneqarnissaanik Naalakkersuisut sulissuteqaqqullugit Inatsisartut aalajangiiffigisassaattut siunnersuut.

(Atassutip Inatsisartuni ilaasortaaitai Finn Karlsen, Siverth K. Heilmann, Knud Kristiansen)

Akissuteqaat.

(Aalisarnermut, Piniarnermut Nunalerinermullu Naalakkersuisoq)

Siullermeerneqarnera

ATASSUT Inuussutissarsiutigalugu piniarnermut allagartat pigineqarsinnaanerinit ukiumut isertitat aalajangiisuujuunaartinneqarnissaat, ukiumulli minnerpaamik ukiup affaata piniarnermut atorineqarsimanissaanik piumasaqaateqartoqalernissaa siunertaralugu Piniarneq aallaaniarnerlu pillugit Inatsisartut inatsisaata nr. 12, 29. oktober 1999-imeersup allanngortinneqarnissaanik Naalakkersuisut sulissuteqaqqullugit Inatsisartut aalajangiiffigisassaattut siunnersuuteqarpoq.

Piniarneq aallaaniarnerlu pillugit Inatsisartut inatsisaata nr. 12, 29. oktober 1999-imeersumi § 4 imm. 2 nr. 4 maannakkut atuuttumi aalajangersarneqarpoq, inuussutissarsiutigalugu piniarnermut akuersissutip piginissaanut piniarnermit, aallaaniarnermit aalisarnermillu isertitat ikinnerpaamik 50 %-iisa nalingat piumasarineqassasoq. Ullumikkut Akileraartarnermut Aqutsisoqarfiup inuussutissarsiutigalugu piniarnermut allagartanik qinnuteqartut suliarineqarnerinit isertitanut paasissutissat tunngavissat nassiussineratigut nakkutilliineq ingerlanneqartarpoq.

Naalakkersuisut pingaartillugu anguniarpaat malittarisassat atuuttut sapinngisamik pisariinnerpaamik akikinnerpaamillu aqunneqarnissaat.

Ukiup isertitaqarfiusup affaa inuussutissarsiutigalugu piniarnermut aallaaniarnermullu qinnuteqartumit atorineqarsimanersoq nakkutigissallugu annertuumik ajornakusoortussat nalilerneqarpoq.

Ukiup isertitaqarfiusup affaanik piniarnermut, aallaaniarnermut aalisarnermullu atuinermit nakkutilliinermit piffissamik atuineq kommunini Namminersorlutik Oqartussanilu allaffissornikkut nalinginnaasumik allaffissornikkut aqutsilluarnissamik piumasaqaammut naapertuutinngilaq.

Aamma taamaaliornikkut inuit piniarnermit aallaaniarnermillu inuussutissarsiuteqarnissamik siunertaq piniakkanik killilersukkanik pissarsisalernissaat aarleqqutigineqarsinnaavoq. Assersuutigalugu inuussutissarsiutini allani piffissap affaanik suliffillit sunngiffimmi piniarnermut allagartamik qinnuteqarsinnaapput, taamaalillutillu inuussutissarsiutigalugu piniartuunngikkaluarlutik piniakkanik killilersukkanik periarfissaqarlutik.

Allaffissornikkut aqutsinermit pisariitsumut siunnersuut naapertuutinngilaq, ingerlatanut piffissamik atuinerit annertuumik nakkutigiuminaassammata. Akerlianik ingerlatamit aalajangersimasumit ukiumut isertitat nakkutiginnissaat pisariinneruvoq.

Siuliini taaneqartut tunngavigalugit, pingaartumillu siunnersuutip allaffissornikkut aqutsinermit ajornakusoornissaa eqqarsaatigalugu, Naalakkersuisut inassutigaa siunnersuut itigartinneqassasoq.